

**Iqalunnut timmisartukkut pisortat aallarnigaannik aquteqaqqilissappat tapeeriutsit assigiinngitsut qanoq ittut pisortanut, namminersortunut innuttaasunullu aningaasatigut kingunissaasa takussutissartaannik kingusinnerpaamik UKA2020-imi Inatsisartunut agguanneqartussamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Mimi Karlsen, Inuit Ataqtigiit)

### **Akissuteqaat**

(Ineqarnermut Attaveqaqatigiinnermullu Naalakkersuisoq)

### **Siullermeerneqarnera**

Naalakkersuisuniit aallarniutigalugu aalajangiiffigisassatut siunnersuummut qujavugut.

Uagut inuttut Nunavummi naggueqatitsinnut kulturikkut atalluta misigimagatta qularutigineqassanngilaq. Qilerut taanna uummarissarneqartariaqartoq Naalakkersuisunit isumaqarpugut, tamannalu aamma 2017-imi kulturikkut qilerutitta nukittorsarneqarnissaat pillugu Nunavummut isumaqatigiissuterpiami malinneqarpoq.

Timmisartut kimmuk angallaviinik misissueqqissaarneq Vivian Motzfeldtip 2017-imi upernaakkut aalajangiiffigisassatut siunnersuummik saqqummiussinera tunngavigalugu suliarineqarpoq, tamatumalu kingorna 2019-imi upernaakkut ataatsimiinnermi Inatsisartuni agguanneqarpoq. Misissueqqissaarnermi tikkuarneqarpoq oqaluttuarisaaneq eqqarsaatigalugu angallavik niuernermit tunngaveqartumik ingerlatsinissamut tapertaasinnaangitsoq. Taamaattumik angallavik kingullermik 2012-imiit 2014-imut misilinneqarsimagaluarluni matuneqarpoq. Aamma siusinnerusukkut suliniuteqartoqarneratigut piffissani assigiinngitsuni Nunavummut Canadamiittumut USA-mullu ornitassat assigiinngitsut arlallit nikerartillugit misilinneqarsimapput.

Taamaattumik inuiaqatigiittut maanna attaveqaatigut atorlugit kimmuk sanilitsinnut toqqaannartumik angallaveqarusukkutta, soorunami tamanna akileraartartut aningaasaataannik tassunga tapersiinnermut atortariaqassavagut. Taperseeriaatsit qanorluunniit ittut naleqqunnerpaatut naliliiffigineqaraluarpata tamanna kingunerisussaavaa.

Kalaallit Nunaata tikikkuminartuunissaanut aningaasaliisoqassasoq Naalakkersuisut isumaqarput.

Tamanna tapeeriaatsit assigiinngitsut, Inatsisartut aalajangiiffigisassaattut siunnersuummi matumani aamma siunnerfigineqartut aqutugalugit anguneqarsinnaavoq. Aallaqqaammuk Canadami oqartussaasuniit aningaasaqarnikkut akuunissamut soqutiginnittoqarnersoq, kiisalu

tamatununga Canadami inatsisini inatsisitigut killiliisunik peqarnersoq misissorneqarpat iluaqutaasinnaavoq.

Aamma attaveqaatinik aaqqissuussinissamut aningaasaliinikkut, soorlu maanna mittarfinnik alliliinitsinni pisutut anguneqarsinnaavoq. Silaannakkut angallasseqatigiiffinit nalinginnaasumik inerniliisarnerit tunngavigalugit mittarfiit naatsut aalajangersimasumik angallaveqarnissamut akornutaasutut isigineqarnerat matumani tunngavigineqassaaq.

Niuerfimmik toqqaannartumik tapiissutitaqanngitsumik ineriartortitsinermut tapersersuisoqarsinnaatillugu tamanna orniginarnerusoq Naalackersuisut isumaqarput.

Maanna mittarfiit nutaat sananeqarmata, attaveqaatit nutaat namminersortut suliniutissaannut nutaanut qanoq sunniuteqassanersut utaqqineqartariaqartoq takuneqartariaqartorlu Naalackersuisut isumaqarput. Naalackersuisut soorunami niueqatigiinnerup annertusinissaanut kulturikkullu avitseqatigiittarnissamut tapersersuiipput, kisiannili aamma siunissami mittarfiit ilusissaanni pisortat tapiinissaasa pisariaqartariaqannginnissaanut ammaffigisussaavarput. Taamaattumik angallavinnik ineriartortitsinermut tapiinissamut periarfissanik misissuilinnginnitsinni ilusiliussassat nutaat sunniutissaat takooqqaartariaqarpagut.

Taamatut oqaaseqarluta Naalackersuisuniit siunnersuutip itigartinneqarnissaa inassutigaarput.